

13. november 2018

UKA2018/57

**Inunnik perulunnertik aamma ikiorneqarsinnaajunnaarnertik pissutigalugu toquinnarusullutik kissaateqartunut ikiuineq naalagaaffittut qanoq isummerfigissallugu kissaateqarnersugut pillugu apeqquteqaat aallaavigalugu oqallinnissamik siunnersuut.**

(Inatsisartunut ilaasortaq Randi Vestergaard Evaldsen, Demokraatit

Inatsisartunut ilaasortap Randi Vestergaard Evaldsen, Demokraatit apeqquteqaat aallaavigalugu oqallinnissatsinnut siunnersuutaanut Siumumiik imaattumik oqaaseqassuugut.

Oqallinnissamik siunnersuutip isummersorfiginiarsarinera imaannaangilaq. Nunani assigiinngitsuni amerlasuuni isummersorfigineqaraluarluni maannamut Europami nunap ataasiinnaap ikiorneqarsinnaajunnaarnerup kingunerisaanik toquinnarusullutik kissaateqartunut inatsisileqalersimanikkut atungarilersimangaa Siumumiik paasivarput.

Toqunissaq tikillugu inuuneq piusarpoq. Inuuneqartuartussaavoq toqup tikiunnissaata tungaanut. Inuunermi piffissaq kingullerpaaq inuunermi pingaarutilerujussuuvoq. Piffissap taamaalinerani toqup qanissusaa takujuartarparput.

Aqqusaartareerpagut ajoraluaqisumik nakorsat nalileereernerini naggataasumik aalajangertariaqartarneq. Tassani eqqarsaatigaakka atortut "uumatitsisuusut" unitsinneqarnissaat qaniginerpaasanut aalajangertinneqartarmata. Aalajangernerit inunnut ataasiakkaanut imaannaangitsumik oqimaattumillu tamatumani pineqarput.

Inuiaqatigiinni kinguaariit nikittarnerini ileqqut allanngoriartorput. Inuttut mianerinnittumik ataqqinninnermillu tunngaveqartumik ileqqugut allanngoriartuinnavissimapput. Oqallisissiarlu una qaqinneqarmat pissusissameersuinnartutut isigisariaqarpoq.

Taamaattorli taama siunnerfeqarnissamut apeqqutit akiuminaatsupilussuit annertuut isummernissamut aporfeqalertippaatingut. Inuk anniagaarluni anniarnaveersaatsinik sakkortungaartunik atuinermi nalaani, inuukatalersimalluni nakorsamut saaffiginnippat, nakorsap nalungikkaluaraa nappaataa katsorsarneqarnikkut aningorneqarsinnaasoq, napparsimasup kissaataa nakorsap piviusunngortissavaa? Tassami toqoreernermi inuuneq uterfigineqarsinnaangilaq. Aalajangernerlunnerup suut kingunerisinnaavai? Immaqa napparsimasup peqqissisimasinnaagaluarnera, inuunermullu nuannersumut uteqqinnissaagaluaminut. Taamaattumik qaqugukkut nakorsat, katsorsaasut allallu toqunneqarnissamut kissaat piviusunngortissavaat? Ullumikkut inuk timikkut pisinnaajunnaarnerani inummut akisussaasup aalajangertarpaa uumatitsissut qamiinnarneqassasoq. Sumut tamanna killinga sinnerlugu inissiisoqassava?

Alloriaqqinnissamullu Siumumiit isumaqarpungut oqallinnissamik siunnersuuteqartup qulequtsiussaa aallaavigalugu ingerlariqqittariaqartugut. Taamaammatt manna iluatsillugu Siumumiit kaammattuutiginiarparput Naalakkersuisut suleqatigissitamik pilersitsisinnaaneq nalilersussagaat, taamaalilluta oqallisissiap qulequtaatut alloriaqqinnissamut suut periarfissaasut qulaajartissinnaaniassagatsigit.

Misigissutsit sakkortuut pigisaraagut, oqallisissiamullu uunga toqqaannartumik attuumangikkaluartoq toqusortatta ikuallanneqartalernissaannik siunnersuuterpassuit maani inimi eqqartortarnikuuagut sulilu alloriarata, Siumumiit isumaqarpugut aamma tamanna alloriarfiusariaqalernissaa siunertaralugu suleqatigiisitamik pilersitsisoqassappat tamanna ilanngullugu isummersorfigineqassasoq tulluarterput.

Jess Svane  
SIUMUT